



## **Majlis Ugama Islam Singapura**

### **Khutbah Jumaat**

**19 Disember 2025 / 28 Jamadilakhir 1447H**

### **Tujuan dan Keutamaan Dalam Kehidupan**

الْحَمْدُ لِلَّهِ الَّذِي خَلَقَ الْإِنْسَانَ فِي أَحْسَنِ تَقْوِيمٍ، وَأَمَرَنَا بِالتَّقْوَى وَالْخُلُقِ الْكَرِيمِ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ، وَلَا تَمُوتُنَّ إِلَّا وَأَنْتُمْ مُسْلِمُونَ.

### **Zumratal mukminin rahimakumullah,**

Bertakwalah kepada Allah s.w.t. dengan sebenar-benar takwa. Takwa dalam melaksanakan perintah Allah dan menjauhi segala larangan-Nya. Takwa dalam menyusun niat, membuat pilihan dan mengatur arah kehidupan. Semoga Allah s.w.t. mengurniakan kita hati yang tenang dan langkah yang teguh atas landasan iman. Amin, ya Rabbal 'Alamin.

### **Sidang Jumaat yang dirahmati Allah,**

Izinkan saya memulakan khutbah pada hari ini dengan beberapa persoalan untuk direnungkan: Apakah **keutamaan** kita dalam

kehidupan ini? Kita hidup bertungkus lumus mencari rezeki dan pendidikan, menjaga keluarga, mengejar kebahagiaan, sebelum kita berangkat kembali kepada Tuhan. Adakah itu sahaja **makna** dan **erti** dalam kehidupan seorang insan?

Hakikatnya, ramai di kalangan kita menjalani kehidupan yang sangat sibuk. Namun, kemungkinan kita kurang jelas dengan arah dan **tujuan** hidup kita. Kita bergegas dari satu tanggungjawab ke satu tanggungjawab, namun jarang sekali kita berhenti untuk menilai: ke manakah arah semua usaha ini?

Sedangkan Allah s.w.t. telah mengingatkan kita bahawa manusia tidak diciptakan sia-sia. Firman-Nya dalam Surah Al-Mukminun, ayat 115:

أَفَحَسِبْتُمْ أَنَّمَا خَلَقْنَاكُمْ عَبَثًا وَأَنَّكُمْ إِلَيْنَا لَا تُرْجَعُونَ ﴿١١٥﴾

Yang bermaksud: *“Apakah kamu menyangka bahawa Kami menciptakan kamu dengan sia-sia, dan bahawa kamu tidak akan dikembalikan kepada Kami?”*

Ayat ini menjelaskan bahawa setiap pekerjaan dan perbuatan seorang Muslim seharusnya tidak kosong daripada **makna**. Ia menegaskan bahawa setiap kehidupan insan mempunyai **tujuan** dan setiap tindakan membawa pertanggungjawaban.

Pada zaman ini, amat mudah untuk kita terperangkap dalam kesibukan. Kita bertindak mengikut tuntutan, menyelesaikan

tugas demi tugas seakan-akan tidak ada kesudahannya. Tanpa kita sedari, hidup kita lebih banyak ditentukan oleh desakan (*demands*), bukan oleh **tujuan** (*purpose*).

Apabila desakan menjadi penentu, **keutamaan** menjadi kabur. Yang lebih penting menjadi tertunda. Yang lebih **bermakna** menjadi sampingan. Sehingga kita lupa apakah yang patut menjadi **tujuan** dan **keutamaan** dalam kehidupan.

### **Saudara yang dikasihi Allah,**

Seorang Muslim yang peka adalah insan yang jelas dengan **tujuan** kehidupannya. Dia tidak membiarkan tekanan, kesibukan dan kebiasaan harian menentukan arah hidupnya. Sebaliknya, dengan mengenal pasti **keutamaan** serta **tujuan** dalam setiap pekerjaan, dia menyelaraskan keseluruhan hidupnya agar sentiasa bergerak ke arah keredaan Allah s.w.t.

Di sini, mimbar membentangkan 3 perkara berkaitan **tujuan** (*purpose*) dan **keutamaan** (*priorities*) dalam kehidupan:

#### **Pertama: Hidup dengan tujuan memperkasa mutu insan**

Mukmin yang mempunyai **tujuan** hidup yang jelas akan lebih berhati-hati dalam setiap perilakunya. Dia bersifat amanah dalam bekerja, bersungguh-sungguh dalam menuntut ilmu dan berakhlak mulia dalam hidup bermasyarakat. Dia sedar bahawa setiap peranan dan tindakannya adalah amanah daripada Allah s.w.t.

**Tujuan** yang jelas akan membentuk disiplin dalaman diri seseorang. Ia menjadi kompas yang membimbing tindakan, sama ada ketika senang mahupun apabila dihimpit tekanan.

**Tujuan** yang jelas memberi kesan yang baik terhadap mutu keperibadian, kerja serta ibadah kita. Tugas dan pekerjaan tidak lagi dilakukan secara sambil lewa dan ibadah tidak dilakukan secara tergesa-gesa. Setiap tindakan diukur bukan hanya dengan hasil duniawi, tetapi dengan sejauh mana nilainya di sisi Allah s.w.t.

### **Kedua: Mengimbangi dunia dan akhirat, bukan memisahkan keduanya**

Sebagai Muslim, kita harus berwaspada daripada membiarkan dunia menguasai hati kita. Namun, agama juga tidak menyuruh kita mengabaikan urusan dunia sama sekali. Sebaliknya, dunia dilihat sebagai wasilah, bukan matlamat yang terakhir.

Ingatlah, apabila dunia dijadikan **tujuan**, ia mungkin akan mengecewakan. Tetapi apabila ia dijadikan wasilah, dunia menjadi ladang pahala dan sumber keberkatan.

Sebagai contoh: Kita menuntut ilmu untuk membina masa depan. Kita bekerja untuk menyara keluarga. Kita merancang kehidupan agar lebih selesa. Semuanya ini boleh **ditujukan** sebagai sebahagian daripada ibadah. Semuanya ini kita lakukan dengan **tujuan** agar ia membawa kita lebih dekat kepada Allah, bukan menjauhkan kita daripada-Nya.

Hayati ikrar yang kita sebutkan setiap hari dalam solat kita:

إِنَّ صَلَاتِي وَنُسُكِي وَمَحْيَايَ وَمَمَاتِي لِلَّهِ رَبِّ الْعَالَمِينَ

Yang bermaksud: *“Sesungguhnya solatku, ibadahku, hidupku dan matiku hanyalah untuk Allah, Tuhan sekalian alam.”*

Dengan ikrar dan kesedaran ini, ia seharusnya mendorong kita untuk **mensyukuri** nikmat seperti harta, kesihatan dan kemampuan yang kita miliki. Uruskanlah ia dengan penuh hemah, amanah dan bijaksana.

### **Ketiga: Mengenal pasti keutamaan dan mensyukuri nikmat**

Setiap **keutamaan** yang dikenal pasti dalam kehidupan, seperti pengamalan agama, kesejahteraan keluarga, kemurahan rezeki dan keselesaan hidup, tidak berdiri dengan sendiri. Ia bergantung pada faktor-faktor lain, seperti suasana kehidupan yang stabil, hubungan insan yang saling menghormati dan persekitaran yang membolehkan kita hidup, bekerja dan beribadah dengan tenang.

Kita mungkin menganggap kesejahteraan ini sebagai sesuatu yang biasa, kerana ia telah kita nikmati sejak sekian lama. Namun, usahlah kita memandang enteng **keutamaan** menjaga kesejahteraan ini. Kerana, apabila ia terganggu atau hilang daripada kita, barulah kita sedar betapa besar anugerah yang kita nikmati selama ini.

Oleh itu, **mensyukuri** nikmat bukanlah sekadar dengan ucapan pada lidah semata-mata, tetapi dengan sikap dan tindakan kita setiap masa.

### **Sidang Jumaat yang dirahmati Allah,**

Penghujung tahun ini adalah ruang untuk kita menyusun semula **keutamaan** dan meluruskan haluan hidup kita. Jangan biarkan tekanan dan kesibukan terus menentukan hala tuju kita. Jadikan iman sebagai petunjuk dan keredaan Allah sebagai **tujuan**.

Semoga setiap peranan yang kita pikul akan lebih mendekatkan diri kita kepada Allah s.w.t. Semoga Allah s.w.t. menerima segala usaha kita dan membimbing langkah kita ke arah kebaikan. Amin, ya Rabbal 'Alamin.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، فَاسْتَغْفِرُوهُ إِنَّهُ هُوَ الْغَفُورُ  
الرَّحِيمُ.

## Khutbah Kedua

الْحَمْدُ لِلَّهِ حَمْدًا كَثِيرًا كَمَا أَمَرَ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى فِيمَا أَمَرَ، وَانْتَهُوا عَمَّا نَهَاكُمْ عَنْهُ وَزَجَرَ.

أَلَا صَلُّوا وَسَلِّمُوا عَلَى النَّبِيِّ الْمُصْطَفَى، فَقَدْ أَمَرَنَا اللَّهُ بِذَلِكَ حَيْثُ قَالَ فِي كِتَابِهِ الْغَرِيزِ: إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ.

وَارْضَ اللَّهُمَّ عَنِ الْخُلَفَاءِ الرَّاشِدِينَ الْمُهَدِّينَ سَادَاتِنَا أَبِي بَكْرٍ وَعُمَرُ وَعُثْمَانُ وَعَلِيٌّ، وَعَنْ بَقِيَّةِ الصَّحَابَةِ وَالْقُرَابَةِ وَالتَّابِعِينَ، وَتَابِعِي التَّابِعِينَ، وَعَنْ مَعَهُمْ وَفِيهِمْ بِرَحْمَتِكَ يَا أَرْحَمَ الرَّاحِمِينَ.

اللَّهُمَّ اغْفِرْ لِلْمُؤْمِنِينَ وَالْمُؤْمِنَاتِ، وَالْمُسْلِمِينَ وَالْمُسْلِمَاتِ، الْأَحْيَاءِ مِنْهُمْ وَالْأَمْوَاتِ. اللَّهُمَّ ادْفَعْ عَنَّا الْبَلَاءَ وَالْوَبَاءَ وَالزَّلَازِلَ وَالْمَحَنَ، مَا ظَهَرَ مِنْهَا وَمَا بَطَنَ، عَنِ بَلَدِنَا خَاصَّةً، وَسَائِرِ الْبُلْدَانِ عَامَّةً، يَا رَبَّ الْعَالَمِينَ. اللَّهُمَّ أَنْصُرْ إِخْوَانَنَا الْمُسْتَضْعِفِينَ فِي عَزَّةٍ وَفِي فَلَسْطِينَ وَفِي كُلِّ مَكَانٍ عَامَّةً، يَا أَرْحَمَ الرَّاحِمِينَ. اللَّهُمَّ بَدِّلْ خَوْفَهُمْ أَمْنًا، وَحُزْرَهُمْ فَرَحًا، وَهَمَّهُمْ فَرَجًا، يَا رَبَّ الْعَالَمِينَ. اللَّهُمَّ اكْتُبِ السَّلَامَ وَالْأَمْنَ وَالْأَمَانَ لِلْعَالَمِ كُلِّهِ

وَلِلنَّاسِ أَجْمَعِينَ. رَبَّنَا آتِنَا فِي الدُّنْيَا حَسَنَةً، وَفِي الْآخِرَةِ حَسَنَةً، وَقِنَا عَذَابَ النَّارِ.

عِبَادَ اللَّهِ، إِنَّ اللَّهَ يُأْمُرُ بِالْعَدْلِ وَالْإِحْسَانِ وَإِيتَاءِ ذِي الْقُرْبَى، وَيَنْهَى عَنِ الْفَحْشَاءِ وَالْمُنْكَرِ وَالْبَغْيِ، يَعِظُكُمْ لَعَلَّكُمْ تَذَكَّرُونَ، فَادْكُرُوا اللَّهَ الْعَظِيمَ يَذْكُرْكُمْ، وَاشْكُرُوا عَلَى نِعَمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.